

兩
浙
金
石
志

兩浙金石志卷八

揚州阮元編錄

宋武佑廟賜額勅牒碑

尚書省牒越州蕭山縣武佑廟

大字行書

江浙淮南等路宣撫使司狀據知越州劉幹申據本州蕭山縣申睦州羣賊侵犯杭州與蕭山縣止隔一水本縣官吏人民禱告本縣北嶺將軍乞借陰兵保護縣郭以後累次兇賊首領部集賊徒備舡欲過江燒劫蕭山縣才方立起旗號便被大風浪飄散賊舡渡江不得西興江口岸上有披金甲人兵擺布旗槍羣賊懼怕不敢過江有此感應靈跡其北嶺將軍未曾立廟額伏乞敷奏乞立廟額伏乞

朝廷指揮詳酌所申事理特賜施行伏候指揮太常寺供
口口本寺檢准令諸神祠應旌封者先賜額今契勘北嶺
將軍依條合賜廟額申聞事勘會睦州改名嚴州小字正書
牒奉

勅宜賜武佑廟爲額牒至准

勅故牒

大字行書

宣和三年六月二十三日牒

小字行書

中大夫守右丞王

大字行書

通議大夫守左丞張押

大字行書

少保太宰押

大字行書

建炎二年正月日朝奉郎知越州蕭山縣事賜緋魚袋曾

右在伏犀泉摩崖正書五行右行字徑三寸餘按樓
攻媿北行日記趙州石橋洞題刻甚衆多是昔時奉
使者有云連鵬舉使金至絕城實居首選宣和六年
八月云云道善或其名邪又廣州九曜石有紹興九
年二月連南夫鵬舉題名曾官廣東轉運使後知廣
州又直齋書錄有連寶學奏議二卷寶文閣學士安
陸連南夫鵬舉撰紹興初知饒州杆禦有功及和議
成南夫知泉州上表曰不信亦信其然豈然又曰雖
虞舜之十二州昔皆吾有然商於之六百里當念爾
欺由是得罪殆鯁直之士而題名書法復爾開張史
雖未傳合此數刻足徵梗概

宋越顯寧廟加封勅牒碑

尙書省牒 越州顯寧廟昭祐公 正書十二字徑三寸

太常寺狀准尙書省劄子三省同奉

聖旨駐蹕會稽今已逾歲妖祲不作行殿載寧越州城隍廟崇福侯可特賜額封公並令太常寺擬定申尙書省依准今降

聖旨指揮欲擬昭祐公伏乞 朝廷詳酌指揮施行申聞
事 城隍廟崇福侯 正書三行徑五分

牒奉

勅朕展義東南駐蹕都會宮室城郭之必葺殆歲之周氣祲妖孽之弗與繫神之祐是用錫上公之尊爵加二字之

榮名不顯其光用示無窮之報自今以始常儲有美之祥
宜特封昭祐公牒至准

勅

故牒

正書六行經四五寸不等內三牒字二勅字皆大草書

紹興元年五月書

省日牒

此行年月在前故牒之下正書徑二寸

叅知政事張

尚書右僕射同中書門下平章事

正書一行經四

寸銜尾皆有押

少傅鎮潼軍節度使判紹興軍府事兼提舉學事兼管內

勸農使充兩浙東路安撫使馬步軍都總管信安郡王食

邑七千二百戶食實封叁阡肆伯戶孟忠厚立石

正書一行經五

分

右碑在紹興府臥龍山城隍廟額題篆書勅賜昭祐

公碑六字徑三寸前碑因賜廟額而立此則加封公爵亦由太常寺狀申尙書省奉勅施行者也二碑前後兩面刻牒式同前惟此碑未有孟宗厚立石題銜一行按忠厚字仁仲隆祐太后兄子前後凡三判越州此其初任也鎮潼軍節度宋史作鎮海軍錢官詹云史誤應從碑高宗本紀紹興元年十月己丑升越州爲紹興府碑前云越州後云紹興府立石在升府之後

宋越州顯寧廟賜額勅牒碑

尙書省牒

越州顯寧廟

正書九字徑三寸

太常寺狀准尙書省劄子三省同奉

聖旨駐蹕會稽今已逾歲妖祲不作行殿載寧越州城隍
廟崇福侯可特賜額封公並令太常寺擬定申尚書省本
寺依准今降

聖旨指揮擬定廟額今欲擬顯寧廟廟額伏乞朝廷詳酌
指揮施行申聞事 正書三行徑五分

牒奉

勅宜賜顯寧廟爲額牒至准

勅故牒

正書三行徑四五寸不等內
三牒字二勅字皆大草書

紹興元年五月

尚書省印日牒 此在前故牒之
下正書徑二寸

叅知政事張

尚書右僕射同中書門下平章事

正書一
行徑四

寸銜尾
皆有押

攝本州助教兼郡口口主管廟事胡永宗

承信郎口口口口指使馬紳捨石 會稽陳師堂刻

小字三行

徑五分

右碑在紹興府臥龍山城隍廟額題篆書勅賜顯寧廟碑六字徑四寸碑文首行尙書省牒越州顯寧廟九大字次三行小字乃太常寺擬定廟額申尙書省狀也次三行乃尙書省牒文後題紹興元年五月日鈐以尙書省印末行押勅二人曰叅知政事張而不名者張守也曰尙書右僕射同中書門下平章事不書姓名者范宗尹也錢辛楣少詹云自元豐官制行而平章叅知之名久廢南渡初詔尙書左右僕射並

帶同中書門下平章事改門下中書侍郎爲叅知政事而宰輔之名又一變矣

宋太學石經

周易二石 每石四列列五十六行行十七字首題周易上經四字次行空三格畫三三卦下無乾下乾上四字次行卽乾元亨利貞云云皆連接至坤卦始更起後並仿此

一周易上經起志行也九五休止

第三列有泐乾元亨利貞貞闕筆作貞避仁宗禎字諱後並同進退無恒恒闕筆作恒避眞宗諱後同窮之災也災作災後同問以辨之辨作辯坤慎不害也害作害

其所繇來者漸矣繇作由下同君子敬以直內敬闕筆
作敬避宋先諱後並同屯磐桓闕筆作桓避欽宗諱
下同比終來有他吉他作它下同

二否大人吉起九三日吳之離止

此石亦有泐大有明辨皙也皙作哲謙君子以裒多益
寡裒作褒案說文有褒無裒集韻云褒聚也通作裒豫
殷薦之上帝殷闕筆作殷避宋先諱遲有悔遲作遲按
說文遲籀文遲字噬嗑履校滅趾校作校下同復无祇
悔祇作祇坎祇既平同案今作祇訛太畜剛健篤實輝
光輝作輝與釋文同離日昃之離昃作昃同釋文案說
文作厝从日仄聲今作昃者卽厝之變體無吳字徐鉉

以爲陌之俗是也自不鼓缶而歌以下並闕

尚書七石 每石四列列四十二行行十七字惟末石三
列後有秦檜記一首其文多模糊難審矣碑內不著卷
第及虞書夏書字其篇題下亦無第一第二等字小序
與篇目皆直接經文其逸篇小序自相連接但不連存
篇之序耳

一頑讒說若不在時起攸徂之民止

自首至欽四鄰庶闕第一列多漫滅禹貢九江孔殷殷
闕筆作殷避宋先諱後並同或作殷西傾因桓是來桓
闕筆作栢避欽宗諱太行恒山恒闕筆作栢避真宗諱
後同五子之歌奈何不敬柰作柰正字敬闕筆作放避

宋先諱後並同峻宇彫牆彫作雕眉征肇位四海肇作
肇後皆同段大令若曆云肇從戈屮聲玉篇五經文字
皆云肇俗肇字于祿字書曰肇通肇正今本說文支部
有肇字唐後人妄增入無疑凡古書內從文作肇皆當
改正明徵定保徵缺筆作徵後皆同湯誓弗協作協後
皆同

二罪疾曰曷不暨朕幼孫有比起予克受非予止

自室家相慶至高后丕乃崇降闕第一列多勛說命下
爾交脩子厥脩乃來脩並作修微子我祖底遂陳于上
底作底吾家耄遜于荒耄作耄天毒降災災作災後皆
同

三武惟朕文考無罪起天降威知我國有止

牧誓昏棄厥肆祀弗咎咎作咎正字尙桓桓闕筆作桓
桓洪範無虐熒獨熒作熒正字使羞其行羞作羞曰貞
貞闕筆作貞避仁宗禎字諱後皆同旅獒大保作旅獒
大作太下同

四若翼日乙止

首闕六行酒誥厥心疾很很作很正字盡執拘以歸于
周拘作拘

五卯周公朝至于洛起若天棐忱我亦不敢知止

洛誥萬年厭于乃德厥作猷

六曰其終出于不祥起六年五服一朝止

立政太史太作大

七羣后之逮在下起至末

自又六年王乃時巡至罔有降格闕上二列皆漫滅

毛詩十石 每石四列列四十五行行十八字惟末石三
列碑內不分卷第其周南召南小雅大雅下亦無第一
第二等字小序皆連經文每篇另起每章連接凡篇後
幾章幾句及風雅頌後總計章句皆無之末石有秦檜
跋語與諸經跋同茲獨明晰可讀附錄之以備考云臣
聞之書曰天降下民作之君作之師自古聖王在上則
君師之任歸于一故堯舜之世萬邦咸寧比屋可封者
治教之明効大驗也仰惟主上以天錫勇智撥亂世反

之正又於投戈之隙親御翰墨盡書六經以及論語孟子朝夕從事爲諸儒倡臣因得請刊石于國子監頒其本徧賜泮宮堯舜君師之任乃幸獲親見之夫以乾坤之清夷世道之興起一人專任其職所爲經綸於心表儀以身者勤亦至矣所望於不應者豈淺哉詩不云乎思皇多士生此王國王國克生維周之翰臣願與學者勉之紹興癸亥歲九月甲子太師尙書左僕射同中書門下平章事兼樞密使監修國史兼提舉實錄院提舉詳定一司勅令提舉編修玉牒所魏國公臣秦檜謹記案此跋尙書左傳論語皆有之文與此同惟朝夕從事上左傳跋有左氏傳三字一人專任其職職字論語跋

作責爲異耳其紹興癸亥歲左傳跋作紹興十三年者
十三年歲在癸亥其年月日俱同也引詩維周之楨楨
作榦者避仁宗禎字諱故改其字也其尙書跋亦當與
此同特文多漫滅不可讀矣

一 周南起報我不述止

關雎鐘鼓樂之鐘作鍾卷耳不盈頃筐筐闕筆作箚避
太祖匡字諱采蘋維筐及莕標有梅頃筐堅之同桃夭
婚姻以時婚作昏行露貞信之教興貞闕筆作貞避仁
宗禎字諱下同殷其雷殷闕筆作殷避宋先諱下同日
月不見答於先君答作荅

一 送子涉淇起青青子佩止

自終風衛莊姜傷已也至來卽我謀闕氓漸車帷裳帷
誤作惟信誓旦旦作旦旦女曰鷄鳴女曰昧旦同竹竿
適異國而不見答答作荅木瓜美齊桓公也桓闕筆作
桓避欽宗諱下及兔爰桓王失信同大車禮義陵遲遲
作遲將仲子以害其弟害作害大叔于田兩驂雁行雁
作鴈清人而禦狄于竟竟闕筆作竟有女同車太子忽
嘗有功于齊大作大風雨風雨淒淒作淒淒子衿刺學
校廢也亂世則學校不修焉校作校修作脩

三悠悠我思起維子之故羔裘豹止

溱洧殷其盈矣殷闕筆作殷雞鳴故陳賢妃貞女貞闕
筆作貞還遭我乎徕之間兮間作閒甫田不修德而求

諸侯修作脩後同盧令勞心怛怛作怛怛敝筓齊人惡
魯桓公微弱桓闕筆作桓園有桃不知我者作不我知
者下二章同案唐石經亦作不我知者當從之此與黍
離不同黍離上云知我者故下云不知我者此蓋涉彼
而誤倒耳山有樞有鐘鼓不能以自樂鐘作鍾下同弗
洒弗掃掃作埽揚之水沃盛強強作彊椒聊實大且篤
實作碩案唐石經亦同今作實誤綢繆則婚姻不得其
時焉婚作昏

四褻自我人究究起輾轉伏枕止

此石漫滅特甚每列闕四行下列全闕衡門可以棲遲
遲作遲

五采繁祁祁起我有嘉賓中心止

自檜至春日遲遲闕首列後闕十餘行七月二之日鑿
冰冲冲作冲冲鴟鴞子尾脩脩作脩脩唐石經同案說
文無脩字今作脩脩孫觀察淵如云脩蓋脩字草書變
眞之誤鹿鳴又實幣帛筐筐闕筆作筭下同四牡周
道倭遲遲作遲采薇行道遲遲出車春日遲遲並同常
棣況也永歎歎作嘆宜爾室家作家室天保如月之恆
恒闕筆作恒避眞宗諱僕夫况瘁况作況南有嘉魚太
平君子至誠平下有之南山有臺則能爲邦家立太平
之基矣太作大彤弓鐘鼓旣設鐘作鍾下同
六好之鐘鼓旣設起我獨居憂止

二列小雅鴻雁前空十行六月以匡王國匡闕筆作匡
四牡旣佶佶闕筆作仕避徽宗諱采芑約軹錯衡軹作
軹車攻復文武之竟土竟闕筆作竟選徒置置作鄒鄒
十月之交讒口囂囂同鴻雁雁作鴈下同鶴鳴他山之
石他作它下同案釋文作它云古他字唐石經亦同祈
父靡所底止底作底我行其野二章爾不我畜畜作蓄
亦祇以異祇作祇正月憂心慙慙闕筆作慙慙十月之
交豈曰不時曰誤作田

七毛取其血脣起經營四方何草止

自民莫不逸至執其鸞刀以啟其闕上三列多泐大田
與雨祈祈作祁祁賓之初筵鐘鼓旣設鐘作鍾白華鼓

鐘于官同采菽數徵會之徵闕筆作徵僅之筭之僅闕
筆作倖白華俾我底兮底作底漸漸之石役久病在外
在作於案陸氏釋文正作役久病於外孔氏正義三見
皆同不作在字

八不立何人不矜起于時言言于止

第三列生民前空九行文王維周之楨楨闕筆作楨殷
之未喪師殷闕筆作殷下及皇矣天監代殷皆同縣廼
慰廼止廼作乃下武公劉並同棧樸奉璋嶸嶸作峨峨
靈臺於論鼓鐘鐘作鍾下同生民不拆不副拆作拆藐
之荏菽荽作叔下同恒之秬秠恒闕筆作恒下同以歸
肇祀肇作肇下同或籛或蹂籛作欺案欺不成字誤脫

竹頭耳旣醉高朗令終朗闕筆作朗室家之壺壺作壺
公劉鞞琫容刀鞞作鞞案鞞从卑聲此从畀誤

九入覲以其介圭起薄言駟者有驛有止

自時廬旅于時言言至孔脩且張韓侯闕下列多泐韓
奕條革金厄條作肇爲韓姑相攸姑闕筆作妣下同實
畝實籍籍作藉載芡春籍田而祈社稷也同江漢肇敏
戎公肇作肇維清肇裡小毖肇允彼桃蟲同常武旣敬
旣戒敬闕筆作攷避宋先諱臣工敬之俱同王旅嘽嘽
旅作游案字書無游字此誤瞻卽譖始竟背竟闕筆作
竟維天之命太平告文王也太作大維清維周之禎禎
闕筆作禎執競鐘鼓喤喤鐘作鍾武勝殷遏劉殷闕筆

作殷下同良耜載筐及筥筐闕筆作倬桓桓武王下
十駟有騶有雉起至末

泮水敬明其德敬闕筆作敷下同桓桓于征作桓桓長
發玄王桓桓同閼宮無災無害災作灾下同烈祖約軼
錯衡軼作軼來假來享享作饗唐石經同臧玉林

琳經

義雜記云正義云以假以享謂來朝升堂獻國之所有
也來假謂諸侯來升堂獻酒來饗謂神來歆饗之據此
知經本上作享下作饗故彼箋以享爲獻此箋以饗爲
神饗之俗本經誤作享遂盡据以改箋疏幸疏中尙有
改之未盡者得据以正之玄鳥宅殷土芒芒殷闕筆作
殷殷武同肇域彼四海肇作肇長發昭假遲遲作遲遲

中庸一石 凡五列列四十行行十四字碑末無跋有篆
聖御書之印四字

必自邇譬如登高必自卑起至末

辟如登高必自卑辟作譬敬其所尊敬闕筆作敬避宋
先諱下並同修身以道修作脩下並同必有禎祥禎闕
筆作禎避仁宗諱久則徵徵闕筆作徵下並同惟徵則
悠遠雖善無徵作徵可一言而盡也一作壹一撮土之
多及其廣大大作厚待其人而後行而作然案正義云
必待賢人然後施行作然字是吾學殷禮殷闕筆作殷
避宋先諱辟如天地之無不持載辟作譬下同爲能聰
明睿知睿作叡案說文作叡古文作睿簡而文簡作簡

君子之所不可及者無之字案正義曰故云君子所不可及者其唯人之所不見乎正無之字

春秋左傳四十八石 每石四列列四十五行行十八字
惟末石三列紹興十三年秋九月甲子秦檜跋凡三十
卷與釋文及今單注本同每卷後皆空三行卷首題云
春秋經傳卷第某下皆注某公二字其同一公而分數
卷者于某公下有上中下及一二三四等字經傳皆各
自連接惟改年則提行另起

此石漫滅甚多每列又缺數行隱元年傳修惠公之好
也修作脩後並同

二父之子嘉父逆晉侯于隨起周內史聞之曰臧孫止

六年其陳桓公之謂乎桓闕筆作桓避欽宗諱後並同
九年祝聃逐之聃作明十一年授兵於大宮授作受誤
十一年鄭伯與戰于竟竟闕筆作竟後並同或作竟又
作竟不徵辭徵闕筆作徵後並同或作微桓元年經鄭
伯以璧假許田璧作璧傳宋華父督督作督後皆同案
唐石經督字皆作督據說文督从目則从日者俗省耳
二年衮冕黻珽珽闕筆作班

三達其有後於魯乎起有寵於莊公莊公止

此石多泐杞侯來朝不敬敬闕筆作敬避宋先諱後多
作放讓事也讓闕筆作讓後並同六年必棄小國棄作

同治金不志卷八
弃後並同案說文弃古文棄字

四曰及爪而代起冬十有二月葬鄭止

自使爲卿爲公娶鄧曼至瓜時而往闕莊十一年得僞
曰克僞作雋天降之災災作灾後並同案說文作裁或
作灾災爲籀文

五厲公傳二十一年起豈不懷歸畏止

下列多泐二十二年遇觀三之否三觀下否下皆不畫
卦後並同二十七年以其立子頹也頹作穢二十八年
闕御疆疆作疆同唐石經

六此簡書簡書同惡相恤之謂也起其娣生卓子及將止
下列多泐閔元年天子申生將下軍大作太僖四年與

屈完乘而觀之完闕筆作完下同

七立奚齊既與中大夫成謀起夷吾無禮止

五年君父之命不撓撓作校下同乃徇曰徇作徇神所
馮依馮作憑六年昔武王克殷殷闕筆作殷避宋先諱
後多作殷七年經盟于甯母母作母傳同傳若君去之
作君若去之同唐石經案今本誤倒當從乙正若總其
罪人以臨之總作惣九年以遺天子羞羞作羞加之以
忠貞貞闕筆作貞避仁宗禎字諱後並同或作貞
八也夏晉太子圉爲質於秦起晉侯無親外內止

自余得請於帝矣至以報嬰林之役闕十八年故以鑄
三鐘鐘作鍾二十年謂行多露謂作爲二十一年實司

大皞與有濟之祀皞作皞同唐石經下同二十二年詩
曰戰戰兢兢曰作云楚子入饗于鄭饗作享下同案享
字是也唐石經此處殘蝕下亦作享字二十三年有人
而校校作校

九惡之吾聞姬姓起以靖國也靖諸內止

二十四年齊桓公置射鉤鉤作鈎魯衛毛聃聃作明鄂
不韓韓作韓韓同唐石經使顏叔桃子顏作殯下同處
于汜汜作汜同唐石經下同王使簡師父告于晉簡作
簡二十五年王饗醴饗作享同唐石經蒼葛呼曰蒼作
倉同唐石經遷原伯貫于吳翼作翼昔趙衰以壺餐從
徑餐作殯同唐石經二十六年經弗及弗作不傳而匡

救其災匡闕筆作匡避太祖諱二十七年責無禮也無
無字案釋文亦作責禮也云本或作責無禮者非

十而敗諸外所獲幾何起九月甲午晉止

二十八年謂楚人曰無曰字同唐石經藝僖負羈氏藝
作熱殺顛頡以徇于師徇作徇而除其害害作害後並
同諸朝將見將作相策命晉侯爲侯伯策作策下同皆
獎王室獎作犒三十年治厘曰厘作厘下同

十一侯秦伯圍鄭以其無禮於晉起以報殺之役二止

且君嘗爲晉君賜矣嘗作嘗若不闕秦將焉取之無若
字將字案唐石經原刻亦無後增注二字考正義亦標
不闕秦焉取之六字使杞子逢孫楊孫戍之楊作楊同

唐石經下同三十一年上怠慢也無也字三十二年文
王之所辟風雨也辟作避三十三年不可冀也冀作翼
武夫力而拘諸原拘作拘遲速唯命運作遲老師廢財
作師老案此誤倒不可從文元年伐縣訾及匡匡闕筆
作斥恆在少者恆闕筆作恒避真宗諱

十二月晉侯禦之起敗秦師于令狐至于止

三年君子是以知秦穆公之爲君也無公字同唐石經
六年辟刑獄作獄刑同唐石經案正義亦作獄刑讓偃
姑而上之姑闕筆作姪避徽宗佶字諱

十三剗首已丑先蔑奔秦起衛侯會公于沓請平止

未列多泐八年晉侯使解揚歸匡戚之田于衛匡闕筆

作厝十一年經傳同九年以懲不恪懲闕筆作懲十年
無畏扶其僕以徇徇作徇十一年經叔仲彭生會晉卻
缺于承匡無仲字同唐石經案注云彭生叔仲惠伯知
經本無仲字釋文云叔彭生本或作叔仲彭生仲衍字
傳至于錫穴錫作錫同唐石經

十四于晉公還鄭伯會公于棐起而使歆僕止

此石泐處頗多十四年懲不敬也懲闕筆作懲廬戢黎
及叔麋誘之黎作黎十六年同唐石經此處闕下作黎
十五

此石漫滅難辨惟未列尙有可審者每列闕十行似至
與之蘭而御之止宣二年驪姬之亂驪作麗同唐石經

三年晉侯伐鄭及邲邲作延同唐石經

十大晉師救鄭起夏五月壬申止

自舜曰妾不才至于良出質夏六月闕十二年無日不
討軍實而申儆之儆闕筆作儆軍衛不徹警也警闕筆
作警以懲淫慝懲闕筆作懲又何以爲京觀乎何作可
無觀字案何字今本誤耳觀字唐石經原刻亦無後增
注河魚腹疾奈何奈作柰

十七退我此乃止起

自曹伯壽卒至隕子辱矣子以衆闕此石下二列多漫
滅每列闕十一行成二年卻子使速以徇徇作徇下同
曰銳司徒免乎無曰字

十八

此石亦湯滅可辨者甚少每列闕十餘行似曰子歸何以報我起此下又闕一石

十九不通則是康公絕我好也起必楚王也射而中止第二列有泐文十三年焚我箕郤箕作其以懲不壹懲闕筆作懲十四年同十四年烏呼烏作鳴十六年不徹徹闕筆作徹

二十

此石惟第三列有清晰者餘皆湯漶難辨十七年匡句須吉匡闕筆作斥下同聲伯夢涉洹洹闕筆作洹

二十一瑩士魴逆周子于京師而立之起晉侯享公公止

十八年匡乏困匡闕筆作厶校正屬焉校作校籍偃爲
之司馬籍作藉案碑中从竹字多書作𣎵如雋字策字
簡字箕字皆然故此籍字亦書作藉耳襄三年盟于長
樛于作於下乃盟于郚外同

二十二請屬郇晉侯不許起

末列殘泐似至具綆缶備止四年可不愆平愆闕筆作
愆敗于狐駘于作於同唐石經七年謂行多露謂作爲
八年倣而師徒倣闕筆作倣

二十三

通石漫滅惟第二列有數十字可辨每列約闕十行此
石下又闕二三石至子以姬氏與之而止

二十四與之邑其從者皆有賜焉起豹自後而擊之范氏之止

第二列多闕二十一年而莫敢不懲懲闕筆作懲二十二年忠信篤敬篤作薦二十三年經知界我來奔界作卑同唐石經傳樂氏之力臣曰督戎督作督下同二十五在臺後樂氏乘公門起我將死其止

右角下闕申驅成秩御莒恆恆闕筆作恆知之難也也作矣二十五年據于蒺藜藜作黎同唐石經下同反隊反作返

二十六宰曰免是反子之義也起賦蓼蕭子展相止下三列有殘泐處枕尸股而哭哭下有之執簡以往簡

作簡下同君昏不能匡闕筆作厓今陳忘周之大德
忘作亡不如奕棋奕作弈下同案弈棋字當从升今作
奕大字非傳會于夷儀之歲至成而不結屬下卷二十
六年經前案唐石經及釋文並同今屬此非

二十七鄭伯賦緇衣起使叔向侍言焉子木止

末列泐二十六年天子瘞美而猥猥作很簡兵蒐乘簡
作簡涉于汜而歸汜作汜同唐石經

二十八亦不能對也乙酉起待其立君而爲之備宋公遂
止

曰棠無咎無作无同唐石經下同崔成有疾而廢之成
作氏說二十八年枵耗名也耗作耗同唐石經說文有

耗無耗字下同恆有子禍恆闕筆作恒

二十九反楚屈建卒起其君弱植公止

末列訛二十九年協比其鄰協作協展玉父玉作王同
唐石經處而不底底作底同唐石經見舞象劓南籥者
劓作荷下同籥作籥聞鐘聲焉鐘作鍾碑謚曰碑作卑
同唐石經下並同三十年單公子愆期期作旗同唐石
經烏乎乎作呼同唐石經

三十子侈太子卑起我小人也衣服附止

擊鐘焉鐘作鍾乃受策入拜策作策三十一年寇盜充
斥斥作斥厚其墻垣墻作牆則恐燥溼之不時溼作濕
下同民之協矣協作協焉簡子與子大叔逆客簡作簡

下同

三十一趙孟曰其幾何止

上三列有殘泐處昭元年而懲諸侯懲闕筆作懲諺所謂老將知而耄及之者耄作耄且及日中不出旦作旦下同而惡焉乎焉作嚮

三十二之間也此皆然矣起昧旦平顯後止

自對曰鍼闕之至善哉肸未闕此石闕首列每列有泐文三年不協而盟協作協少姜有寵而死姜作齊同唐石經

三十三世猶怠况日不悛起黑而上僂深目止

中二列泐湫隘焉塵焉作嚮伯石之汰也汰作汰四年

同四年吾未見者有六焉吾下有所同唐石經慶封惟
逆命惟作唯同唐石經以徇於諸侯徇作徇此下當闕
三石

三十四而乞師於諸侯王止

每列皆有殘闕十一年單子曾韓宣子于戚宣闕筆作
宣十二年其以中雋也雋作雋葬鄭簡公簡作簡司馬
督囂尹午督作督囂作囂

三十五

此石上二列畧存影迹下二列漫滅每列約闕十行此
下又闕一石

三十六

此石湯滅惟末列尙有清晰者每列亦闕十行

三十七公載寶以出起費無極取貨於東國而謂蔡人止
中二列有初二十年以攻荏苒之盜苒作蒲二十一年
器以鍾之鍾作鐘此下闕一石

三十八子車曰衆可止

此石殘剝亦甚二十六年不知天之棄魯耶耶作邪同
唐石經

三十九月晉殺祁盈及楊食我起君必逐之苟止

自懼也而不可怒也至乃殺之夏六闕此石亦多泐二
十八年吾懲舅氏矣懲闕筆作懲下同顓頊氏有子曰
犁頊闕筆作頊避神宗諱三十年明底其情底作底我

先君簡公簡作藺吾又疆其讐疆作彊讐作讎

四十噪以晉侯之命唁公起晉人假羽旄於鄭鄭止

下二列有泐三十一年懲不義也懲闕筆作懲下同三十二年遲速衰序遲作遲定元年季孫問於榮駕鸞駕作駕同唐石經

四十一人與之明日或旆以會起子必使往他止

此石多剥泐四年以藩屏周藩作蕃同唐石經而封於少皞之虛皞作皞正字聃季授士聃作明五年報觀虎之役也役作敗同唐石經六年取匡闕筆作斥

四十二日公謂樂祁曰起誰之劒也吾稱子以止

下列有泐七年晉籍秦送王籍作藉八年同八年王孫

賈趨進趨作趨何遲之有遲作遲

四十三告必觀之起殺斟灌以伐斟鄩止

此石殘泐頗甚十三年上軍司馬籍秦園邯鄲籍作藉
十四年同哀元年報檣李也檣作檣

四十四二子者禍矣恃得君止

此石多剝泐三年世爲婚姻婚作昏同唐石經
四十五不如死棄盟逃讐亦不如死起國書高無平帥師
伐我止

上二列每列闕十七八行第二列每行又闕二三字末
列殘泐七年猶聞鐘聲鐘作鍾八年我未及虧虧作虧
九年吳子使來儆師伐齊儆闕筆作儆十年同

四十六及清季孫謂其宰冉求起由弗能齊簡公之在止
十一年樊遲爲右遲作遲使室孔姑姑闕筆作舛十二
年岳戈錫錫作錫下同十三年鄭子賡使徇徇作徇遲
速唯命遲作遲

四十七其亦夫有奮心起懿子曰君愎而止

自魯也闕止有寵焉至民知不死皆闕此石亦多殘泐
二十二年吳爲無道吳訛作吾

四十八虐少待之起至末

首列剝泐頗甚闕十餘行二十七年寡君命恆曰恆闕
筆作恒因孫於邾於作于同唐石經

論語七石 每石四列列二十七行行十六字或十五字

字帶行書後有紹興癸亥歲九月甲子秦檜記一首凡
十卷與今注疏本不同與單注諸本合首題論語卷第
一五字次學而第一四字次卽子曰學而時習之云云
每章皆連接後仿此

一論語卷第一起有反坫管氏亦止

學而敬事而信敬改作欽避宋先諱爲政不敬何以別
乎季康子問使民敬忠以勸臨之以莊則敬皆同夫子
溫良恭儉讓以得之讓改作遜八佾揖讓而升同爲政
樊遲御遲作遲下同殷因於夏禮殷改作商避宋先諱
下及八佾殷禮吾能言之殷人以柏皆同八佾起不足
徵也徵闕筆作徵下皆同邦君樹塞門樹闕筆作樹下

同

二有反玷管氏而知禮起子曰赤之適止

爲禮不敬敬改作欽下又敬不違及公冶長其事上也
敬久而敬之雍也居敬而行簡皆同里仁惟仁者能好
人惟作唯能以禮讓爲國乎讓改作遜下同公冶長雖
在縲紲之中紲作紲案當從之今作紲者乃唐人避諱
所改五經文字云紲本从世緣廟諱偏傍今經典共準
式例變不可雕也雕作彫不可朽也朽誤作朽

三齊也乘肥馬起深淵如履薄冰止

下三列頗泐述而惟我與爾有是夫惟作唯暴虎馮河
暴作暴齊戰疾齊作齋桓魋其如予何桓闕筆作桓避

欽宗諱得見有恆者斯可矣恆改作常避眞宗諱人潔
已以進潔作絜下同泰伯三以天下讓讓改作遜
四而今而後起食饁而餽魚止

孟敬子問之敬改作欽巍巍乎舜禹之有天下也下巍
字作魏下巍巍乎其有成功也下巍字同案此乃書法
好異故變其體耳以服事殷殷改作商子罕過之必趨
趨作趨鄉黨兩趨進皆同

五餒而肉敗不食起司馬牛問君子子曰君子不止

首列卷五後空五行先進門人不敬子路敬闕筆作敬
子畏於匡匡闕筆作斥避太祖諱其言不讓讓闕筆作
讓

六不忠信行不篤敬起血氣未定戒止

自憂不懼曰不憂不懼至雖蠻貊之邦行矣言闕第三列每列僅六七字下半闕第四列全闕衛靈公行不篤敬敬闕筆作敬下則民不敬事君敬其事皆同乘殷之轡殷闕筆作殷不讓於師讓闕筆作讓

七者與之其不可者拒之起至末

自之在色及其壯也至對曰子夏曰可闕末列泐子張其惟聖人乎惟作唯窺見室家之好窺作闕同釋文堯曰修廢官修作脩

孟子十一石 每石四列列二十八行行十六字亦有十五字及十七字者字帶行書凡十四卷每章俱提行另

起

一不可以敵強海內之地起則何爲不行王止

自首至不可以敵衆弱固闕梁惠王上無恒產而有恒心者恒闕筆作恒避真宗諱下同樹之以桑樹改作植梁惠王下由古之樂也由作猶百姓聞王鐘鼓之聲鍾作鍾下同文王事昆夷昆作混雜記云趙岐注詩云昆夷兌矣案詩縣作混夷駝矣鄭箋云混夷夷狄國也釋文混夷奇昆王應麟詩攷載說文昆夷駝矣而縣正義引說文詩云混夷駝矣皇矣患夷載路箋云患夷卽混夷釋文混夷音昆正義曰采薇序曰西有混夷之患據此則孟子昆夷當從石經作混夷與詩合趙注同

作昆者蓋因聲近而亂放於琅邪於作于吾何修而可以比於先王觀也修作脩惟君所行也無行字召大師曰太作大哀此梵獨梵作梵

二夫子當路於齊管仲晏子止

首列多泐古公亶父父作甫後我后後作倭間於齊楚間作閒

三今此下民起辭曰聞戒故爲兵餽止

自功可復許乎至綢繆牖戶闕公孫丑上自生民以來自下有有字案正義云言自有生民以來而至於今正與此同無辭讓之心讓改作遜下同公孫丑下君臣主敬敬改作欽避宋先諱下皆同桓公之於管仲桓改作

威避欽宗諱下同

四之子何爲不受起夫道一而已矣止

凶年饑歲饑作飢案饑爲饑饉字飢爲飢餓字此饑歲字正當从幾作飢者字帶行書故從省耳周公使管叔監殷殷改作商避宋先諱下皆同

五成鬲謂齊景公曰起大哉堯之爲君止

滕文公上有恒產者有恒心恒改作常下皆同殷人七十而助殷改作商下同其命維新維作惟井地不均均作鈞許子必織布而後衣乎而作然案趙註云許子自織布然後衣之乎又正義云許子必織布然後衣乎孟子又問許子必自織布然後衣著乎皆作然字有小人

之事人作民樹藝五穀樹改作植長幼有序序作敘案
正義云長幼有等敘正同此匡之直之匡改作正避太
祖諱

六惟天爲大起

此石多泐而入于幽谷者于作於或相什伯伯作百狐
狸食之狸作狸似至湯使人遺之牛羊葛止

七堯舜之道焉非其義也起是天子而友匹夫也止

白伯食之又不以祀至伊尹耕於有莘之野而樂闕末
列多殘滅萬章上歸潔其身而已矣潔作絜遭宋桓司
馬桓闕筆作桓主司城貞子貞改作正避仁宗禎字諱
萬章下遲遲吾行也作遲遲非王公之尊賢也無之字

案正義云是士者之尊賢矣非所謂王公大人尊賢者也是解經上句有之下句無之知之字衍也

八用下欽上起猶人之性與止

用下敬上敬改作欽下同殷受夏殷改作商下同孔子奚取焉取非其招不往也焉下有哉無其字

九告子曰食色起指不若人則知惡止

此石多泐告子上則誰敬敬改作欽下皆同或相倍蓰而無算者算作美

十下而去之仁者固如此乎起舍則失之是求有益於止白之心不若人至夫子在三卿之中名實未加於上闕告子下則有讓讓改作責桓公爲盛桓改作威無易樹

子樹改作立敬老慈幼敬改作欽後迎之致敬同人恒
過恒改作常下同徵於色徵改作證不立乎巖牆之下
牆作牆

十一曰舜爲天子起是爲馮婦也晉人有馮止

自得也求在我者也至桃應問闕首六行上皆闕數字
下列多泐盡心上愛而不敬敬作欽下同亦教之孝弟
而已矣弟作悌有答問者答作荅下同盡心下武王之
伐殷也殷改作商能讓千乘之國讓改作遜桀盛旣潔
潔作絜遲遲吾行也作遲遲自婦者善搏虎至末皆闕
石經歌

有序

昔宋太宗嘗曰朕退朝觀書外留意字畫雖非帝王

事業不愈游畋聲樂乎迨後口口口口口口當寫書
不惟學字又得經書不忘紹興二年宣示御書孝經
繼出易詩書春秋左傳論口及口口口口學學記儒行
經解五篇總數千萬言刊石太學淳熙中孝宗建閣
奉安親書扁曰光堯石經口口新安朱熹脩白鹿書
院奏請大帝石經本是也元初西僧楊璉真伽造塔
行宮故址取碑石壘口口州路官申屠致遠力爭而
止後因改學爲西湖書院歲久閣廢石經斷折零落
洪武中移仁和學于書院然石經久廢人莫知留意
也宣德元年夏予出按于杭觀之慨歎廼以屬郡守
盧君王潤率教官生徒四散收拾得全碑若干碎折

若干一一補鑄共得經碑百片輦致殿後及兩廡見者驚嘆因作長歌備載其事云

思陵避敵東南隅臨安建國稱行都投戈講藝事經術
諸經語孟咸親書字形僅比黃庭小楷法欲與爭先驅
宸章赫奕麗霄漢鸞翔鳳翥昭神謨宰臣敷奏勒琬炎
工徒竭蹶爭奔趨琢成豐碑凡二百一一摹刻無遺餘
身高八尺廣踰半上圓中直安方趺列藏成均首善地
要令萬世瞻宏模淳熙紹統構傑閣覆葢護惜同璠璣
嘗令良工打石本散布學校周寰區炎精墮海宋社屋
口元徙宇崇髡徒豪酋楊璉媚姦相走舁碑石營浮圖
路官申屠力爭止改立書院名西湖陵夷百年閣旣毀

石經倒折誰匡扶小者措塲布行徑大者顛倒橫溝渠
遂令至寶逢汙巉誰復張眼來睢盱嗟予好古生何晚
忝官六察乘輶車仁和邑庠偶得見對之不覺成歎歔
岐陽之鼓久已沒東都石經今亦無俗流愛好蘭亭刻
視此何啻天淵殊急命郡守集吏卒手舁繩拽來庭除
爬沙剔洗去垢穢灰黏鐵鈕相聯挈尋行數字共合轅
安置長廊寬更舒東西峙立無机枰深簷蓋護何地虞
零殘塊礫埋殿後免遭賤辱居泥涂當今聖明御四海
嚮用經術崇文儒浙江大府列藩臬聖人謨訓當宏敷
我歌石經示來者立言雖鄙良非誣

宣德二年歲在丁未秋七月朔旦巡按浙江監察御史

海虞吳訥識

孔戶部

繼涵

曰南宋太學高宗御書石經殘碑乾隆戊子之夏錢唐張秀才廷謨爲搨得寄余爲紙七十四緡外增明趙嘉龍刻孝經碑吳訥石經詩碑二紙圖贊則未及也朱彞尊之考石經也於光堯閣石經載洪邁會惇楊冠卿葉紹翁王應麟李心傳陳騭潛說友陳基吳訥楊一清文壁郎瑛于慎行諸說然於刊刻後先字行增損碑數移置廢葺未能通覈折衷之按正德十二季巡按監察御史宋廷佐檄知府留志淑遷仁和縣學石經於府學楊一清爲記有云留君稽閱志籍蓋宋高宗初渡江都臨安卽詔建學養士紹興二年手書易書詩

春秋論孟中庸儒行諸篇刻石於學京兆尹趙礪老建
尊經閣以儲之二十四年複製宣聖洎顏曾以下七十
二賢贊并李伯時舊所繪像皆刻石置之學理宗紹定
五季又以所製伏羲以來道統贊刻之附諸石經之末
與經義考所采玉海頗不合玉海云紹興五季九月廷
試畢賜汪應辰以下御書石刻中庸篇十二季賜陳誠
之周官十八年六月御書儒行篇賜進士王佐等二十
一季五月賜趙達等大學二十四年賜張孝祥等臬陶
謨二十七年賜王十朋等學記三十年四月賜梁克家
經解篇是時所賜止是十三年上諭輔臣曰學寫字不
如便寫經書不惟可以學字又得經書不忘旣而尙書

委知臨安府張澂刊石頒諸州學是時所刊亦止易書詩春秋左氏傳四經宋史高宗紀十二季四月甲申增修臨安府學爲太學十三季所頒止及州學不言太學是尙未置太學也十六年上又書論語孟子皆刊石立於太學首善閣及大成殿後三禮堂之廊廡是續刊論孟同立太學應在此時秦檜傳紹興十二年八月徽宗及顯肅懿節二梓宮至行在太后還慈寧宮幸和議復成十三年祥瑞繁多於是粉飾治具如鄉飲耕藉之類節節備舉兩相印證明白無疑淳熙四年二月詔知臨安府趙磻老於太學建閣奉安石經置碑於閣下墨本於閣一以光堯石經之閣爲名朕當親書五月磻老奏

閣將就緒其石經易詩書春秋左氏傳論語孟子外尙有御書禮記中庸大學學記儒行經解五篇不在太學石經之數今搜訪舊本重行摹勒以補禮經之闕從之是立石太學與建閣爲兩帝兩事而禮記五篇高宗時未入太學也汪應辰傳祥甫十八爲進士第一人上初覽其對意其爲老成之士及唱第乃年少子引見者掖而前上甚異之舊進士第一人賜以御詩及是特書中庸篇以賜據傳云特書則非石刻而王應麟同時人又不應有誤豈第一人爲手書餘爲石刻耶然總與太學石經無與中庸真草孝經羊祜傳皆賜秦檜檜所請刊石者十三年頒御書孝經周官中庸羊祜傳於天下州

學與開喜宴所賜趙礪老訪求之舊本皆是別有刻石
朱彝尊取證太學石經則乾道所賜之益稷淳熙所賜
之旅獮何所安置石刻鋪敘云高宗親御翰墨作小楷
以書周易尙書毛詩春秋左傳全帙又節禮記中庸儒
行大學經解學記五篇章草語孟悉送成均九月甲子
左僕射秦檜請鐫石以頒四方卷末皆刊檜跋語是又
誤以禮記五篇爲檜請刻檜跋者今詩論語左傳末一
碑俱存皆有檜跋語同蓋欲書禮記并刻於太學而
未及者也重摹中庸無跋末鈐一小璽文爲御書之印
以檜跋爲吳訥捫去者亦好事者之言并無其事光堯
石經閣原建於太學鹵北隅少帝熈德祐閒學廢元初

西僧楊璉真伽欲取碑石壘塔爲杭州推官申屠致遠
力爭而止元末肅政廉訪使徐炎改爲西湖書院明洪
武十二年卽書院爲仁和學迨末年復徙學於城隅之
貢院而石經亦昇致焉龜跗螭首十缺其半宣德元年
侍御史吳訥屬郡縣收緝凡得全碑及碎折者百片置
之大成殿後兩廡正德辛未巡按張承仁欲遷置府學
學諭南寧李璧懇留而止至戊寅巡按宋廷佐卒遷之
時李已除任無有能爭之者至崇禎末廊圯乃嵌之壁
中爲遷徙變置者五其殘壞散佚皆由於此非楊璉取
之去也蓋徙學移碑於洪武而修葺於宣德元年二十
餘年不應敗壞復修必顛倒堆棄未一置之所其輦致

時安得枚數次第之而無所遺邪既雜於階城礎石之
賸後之俗更有陰爲馮熙常伯夫之爲而不自知者是
石經之亡亡於徙學不亡於楊璉故吳訥楊一清于慎
行郎瑛諸記皆謂爲申屠致遠所遏而止惟文徵明跋
有石經竟亦散落之語而朱彝尊因之無足取証文徵
明之跋作於正德十二年適值徙碑之時而有前後斷
缺無書人名氏語只據殘本不考刻石槁昧甚矣

右石經碑共八十六石明人吳訥石經歌一石在今
杭州府學內禮記中尙有儒行大學經解學記四篇
已亡佚不可得周易自離九三以下皆無之較書詩
等所缺特甚碑之存者亦多殘剝其字論語孟子皆

行書結體較大中庸次之易書詩左傳俱小楷又諸經凡遇避諱字皆本字闕筆惟論孟則多改字如敬作欽改殷作商改恒作常改桓作威等皆是葉紹翁四朝聞見錄云高宗御書六經上親御翰墨稍倦卽命憲聖續書至今皆莫能辨具也其異文雖不多頗足校正今本之誤如毛詩子尾脩脩今作脩脩爲訛字左傳不闕秦焉取之今不上有若焉上有將爲衍文禮吾所未見者有六焉今無所字爲脫文此多與唐石經同可見南宋時經猶爲善本攷古者宜所寶貴矣今就碑之存者以毛氏汲古閣本詳校其文閒爲攷證其每經存若干石及每石起止昔人所言

多未得實惟曲阜孔誦孟所著石經記甚爲詳核茲錄存之

宋觀世音經像碑

已定居士董仲永向施小字觀音經後以湮沒遂成中輟今復命工刊經於石用廣其施又求得菩薩妙相李伯時墨本同刻諸石作無盡施永仲稽首合掌說偈贊曰

真觀清淨觀廣大智慧觀悲觀及慈觀常願常瞻仰歎佛功德上祝今上皇帝聖壽無疆二聖早還京闕天眷共保千祥四海晏清兵戈永息風調雨順國泰民安法界衆生同霑利樂時紹興二年歲次壬子中元日記前住廬山三峽雪屋叟 曉常勸緣

右在六和塔壁間碑凡四列共一百三十三行小楷
書前有大士圓光小像又一像高二寸餘據跋經爲
董仲永書像爲李伯時筆而刻手不精僅存形似耳
宋至德壇銅器

紹興二年

大寧殿臣

蘇漢臣監

督姜氏鑄

至德壇用

右宋至德壇銅器錢唐趙氏藏蓋長方皆雷回紋左
右有獸面蓋面水紋作梅花十六朵每瓣穿空出氣

似今之熏爐狀其底有銘篆書凡二十字按咸淳臨
安志南宋時吳山有至德觀蓋卽此壇也圖繪寶鑑
蘇漢臣開封人宣和畫院待詔師劉宗古工畫釋道
人物臻妙尤善嬰孩紹興間復官大寧殿又案居易
錄載宋方爐欵識文與此同云姜氏卽姜娘子南宋
人善鑄銅器者

宋湛泉題字

湛泉

先公政和乙未歲謫居丹丘所題時義問與叔兄侍行後
十八年義問復來作酒官而翰墨尙存追念疇昔不勝感
涕謹勒崖間以永其傳紹興癸丑季春十五日男義問恭

書

右刻在台州郡城白雲山大悲庵石壁後有正書跋
文磨泐難辨惟初拓伸帑時水痕筆法尙隱隱可識
爾義問當是葉義問字審言壽昌人建炎二年進士
初仕卽疏時相奸邪分教上饒擢侍御史陞吏部侍
郎時主和議奏急務六事備金患陞樞密院同知使
金還進知樞密院事金主亮窺江上命視師江淮御
書義問到處如朕親行八字于旗賜之遂有采石之
捷孝宗卽位封新安郡侯資政殿學士義問登政府
所得俸祿盡周故人無貲泊第寓衢州菴舍以卒謚
忠簡

宋永靈廟勅牒碑

尚書省牒湖州新市鎮永靈廟

禮部狀准都省批送下兩浙轉運司奏據湖州申准禮部
符據湖州新市鎮父老陳侑等狀委見土地保寧將軍近
自方賊等作過陰助並無驚擾民獲安堵乞降廟額尋下
德清縣勘會靈應事跡今據德清縣申勘會得土地保寧
將軍靈顯保明詣實州司保明詣實乞依條施行本司遂
委右迪功郎就差秀州嘉興縣主簿沈柄體訪詢究據沈
柄申體訪委有靈應保明詣實本司再委右朝奉郎本司
幹辦公事朱正剛覆行按實朱正剛申體訪得禱求皆獲
靈感保明詣實本司保明亦委詣實前批送禮部本部尋

行下太常寺勘會去後今據本寺狀檢會已降指揮節文
神祠未經封爵者如有靈應卽先賜額今來兩浙轉運司
保奏到湖州新市鎮土地保寧將軍祈禱靈應依所降指
揮會先賜額本部欲依本寺所申事理施行伏乞
朝廷詳酌指揮伏候指揮

牒奉

勅宜賜永靈廟爲額牒至准

勅故牒

紹興五年 月 日牒

參知政事

尙書右僕射同中書門下平章事

尚書左僕射同中書門下平章事

右碑牒文三列首行後有禮部申狀十八行是行書
在德清縣新市鎮按舊志神姓朱諱泗父煦三國時
朱然之弟從軍于司馬氏部下晉咸寧中伐吳煦妻
從行伍至鎮婉焉江左立國神往應募永昌元年王
敦反昌陣而亡泰寧二年追封鎮國大將軍此申據
文第稱保寧將軍青溪之擾陰獲神祐而已按建炎
三年正月有古跡靈神顯慶去處許州縣奏聞加封
冊額之詔自此踵事而起者在在有之矣

朱石觀音院題名

臨安府錢塘縣湖北界口口坊居住奉三寶弟子口口同

妻口氏口家眷等謹施淨財命工開鑿釋迦寶殿一口佛
以下六行全泐

皇宋紹興五年歲次甲寅仲冬口口謹題

右在石觀音院摩崖正書十行行字不等

宋煙霞洞題名

雒陽尹彥明趙伯奕邢叔端朱晞真致一時可子寅寧極
維方紹興戊午十月六日同來

右在烟霞洞摩崖篆書五行字徑一寸西湖志謂此
篆卽朱敦儒所書也嘉興府志朱敦儒字希真汴人
天性曠達以詞章擅名南渡寓郡城有讀書堂在天
慶觀右

宋汪藻等題名

龍圖閣直學士前知湖州□□汪藻新知無爲軍恬蒼□
□祖知長興縣安肅張琮前歙縣丞汝陰孟處義前監南
嶽廟吳興劉唐稽紹興戊午中春來游右承務郎汪悟汪
恪從行 □□徐□刻字□明□□□□

右題名七行行十字八分書字徑二寸末行下有小
字三行似刻工姓名磨滅難辨在長興縣顧渚明月
峽俗稱顧渚王潭西崖仰石摩崖宋史文苑傳汪藻字彥章

饒州德興人崇寧中第進士紹興二年除龍圖閣直
學士知湖州請修日歷旋以事貶秩復起知撫州又
爲言官所論予祠至六年復詔纂修日歷賜史館修
撰錢聽辟屬編類八年書成上之遷顯謨閣學士

尋知徽州其屬鮑延祖孟處義咸增秩有差今題名藻系銜龍圖閣直學士前知湖州與傳合而戊午紀年正屈書成是藻予祠後嘗流寓長興之龍灣纂修卒業放情山水故所著有龍溪集又按浮溪集載吳興何氏書堂記云予老矣方買田若溪之上時爲紹興十年十月距成書又逾二載是其久寓長興之明証也今譚志於寓賢條內刪去藻名並言其未嘗留寓于此可謂失攷之甚石刻括蒼下缺二字應是鮑延祖署銜新知無爲軍當是書成後所授新秩張琮長興縣志未載年月里居可據此補之劉唐稽字林宗樞密珏之子也少守家學顏其齋曰養浩彥章

爲之記并薦於朝後擢守常州

朱永靈廟加封勅牒碑

尙書省牒湖州德清縣新市鎮顯佑侯

禮部狀准都省批送下雨浙運司奏據湖州德清縣新市鎮父老市戶陸修等狀竊見本鎮土地保安將軍自方臘等作過陰功護助並無驚擾得獲安堵准勅賜永靈廟爲額又於紹興七年七月大旱詣廟祠祈求不及旬日果霽霖雨及紹興八年二月久雨連綿又建道場卽時賜霽奏有靈應於民乞封爵號本司遂委右迪功郎秀州崇德縣主簿曾怱躬親詢究及再委左從事郎添差本司准備差遣元益覆行按實所陳靈應委是有功於民事跡顯著本

司保明詣實尋行下太常寺勘會去後今據本寺申今來
兩浙運司保奏到湖州德清縣新市鎮土地永靈廟保寧
將軍每遇亢旱及大雨連綿祈求靈應乞封爵號本部今
欲依本寺所申事理施行伏乞

朝廷詳酌指揮施行

牒奉

勅湖州德清縣新市鎮土地永靈廟保寧將軍惟神之靈
覆護一方曰雨曰暘隨禱而獲肆加顯號用答殊休永佑
我民歆于世世宜特封顯佑侯牒至准

勅故牒

紹興九年五月 日牒

參知政事李抑

叅知政事孫抑

尙書右僕射同中書門下平章事押

右碑牒文四列俱行書首列禮部申狀十八行正書
在德清縣新市鎮保寧將軍紹興五年賜額永靈此
于六七年間旱潦之應復請封號加爵顯佑也惟神
之靈云云間作誥體知當時體制不必盡同自是而
後慶元二年加封顯佑通應侯端平三年加顯佑通
應惠利侯勅并見後明沈戩穀永靈西廟記又言慶
元二年封神妻協惠夫人元進封靈感公夫人加昭
慶順應助吉世子封保慶嘉濟永昌侯宋勅現存無

封妻子事皆未見諸勅也

宋永靈廟土地顯佑侯碑

湖州德清縣新市鎮永靈廟土地顯佑侯記

夫惟天下之大四海之廣曰山曰川曰城曰野必有神以主之有爲淫厲者有施利澤者爲淫厲則苦於民而常祀固不能繇遠施利澤則感於民而時祀殆歷悠久者也愚嘗聞諸長老攷諸舊記 土地顯佑侯利澤加於民至

矣爲人則力救大旱爲神則德花生民宣和靖康間顯靈以攘寇盜保土以弭凶荒時遇雨暘札瘥人咸禱之禱無不應應無不驗其清災轉禍不可勝紀民今實受其賜則民豈易忘耶祠宇落成于有晉鎮于鎮之震位俾民有所

祈獻來者輻湊周邦曾益其所爲規模崇大由是符祥不
一動應無方乃獲封號保寧士民景仰祭愈克誠今由始
也後以風俗浸廣強勝日生別有所建立者華靡之風使
之然也殊不知神之佑民皆吾民也豈一境土而分禍福
哉神亦知其爲心故不待盡言曷容以浮辭飾說厚誣于
衆也神之感應如響鄉老編其功績告于所隸官覈其實
敷奏于

朝紹興乙卯得賜廟額永靈自茲護我實多隨又切陳之
紹興己未蒙謚侯爵顯佑於歲侯之積功累德宜其大賚
感

當今之寵錫敢謂無德以將之信知列于典祀永享廟食

同治金不記卷八
四
可期不朽也歟與進然爲星之晚生荷神之休願傳世世
謹以記之紹興十年三月望日邑人孫與進記玉京田約
書并題額

承信郎薛理 保義郎孫珣 承信郎添差鎮稅趙不
處 秉義郎添差鎮稅聶皐 右宣教郎監湖州德清
縣新市鎮稅兼煙火公事蔡凡 右迪功郎縣尉魯可
封 右迪功郎主簿王勣 左從事郎縣丞陳一鶚
左承議郎知湖州德清縣主管勸農公事劉嘉成

右碑正書十九行題額勅賜顯佑侯記六字亦正書
在德清縣新市鎮此因前五年賜額九年加封邑人
孫與進紀事之文也文云祠宇落成于有晉是仍舊

志謀悠之說又云爲人則力救大旱爲神則德芑生
民則生時必有實績昭著當世有能言之者此保寧
之稱所自來而明沈戩穀永寧西廟碑又謂周廣順
間封保寧將軍此又一說也題名惟劉嘉成紹興七
年任著於錄餘皆不傳

宋小天童山施財米疏碑

大宋國常州宜興縣成任鄉常富里居住奉三寶弟子吳
憲謹施淨財壹阡伍佰貫文足米貳伯碩入明州天童山
景德寺營建寢宮一所鳩茲勝刹式薦

先考六十大夫

先妣宜人呂氏五十八娘子

先兄知府少卿學士超昇

佛界

右恭惟

三寶卽知謹疏

紹興十年三月 日弟子吳憲疏

右碑文正書十二行在鄞縣按宋人稱名多以行數
計發源于六朝盛于唐此重門第誇氏族之一端也
此刻于父母稱六十大夫五十八娘子欲顯親而轉
致晦亦勿之思矣憲以宜興人檀施山積營建寢宮
亦釋氏之僅見者也

宋大用庵銘

大用庵銘

廓然之宗空而不空智游方外妙入環中環中湛存用之
不痕惚造化柄見離微根窮極離微玄樞活機河橫澹蕩
斗轉依稀依稀成用用與體共家未中形功初內動動而
影彰靜而智藏光容天地兆變陰陽陰陽變兆用得之要
春在百花風號萬竅竅竅中虛雖有而無聲不礙器色不
染珠珠兮走盤不見其端壁立千仞赤肉一團一團赤肉
應緣其足像兮臨鑑神兮居谷谷神是誰靈靈自知說用
如鼻眺用如眉用之立換寄世而玩彈指開門相招隔峴
隔岸相招拈却木橋等閒一喚適用全超超用較些相逢
作家雨雲翻覆雪又交加交加不傷用純愈光拍拍是令

人人當行當行往還用亡險艱如石含玉似地擎山山畜
海藏規圓矩方頸頭得用恰恰相當相當酌盡混成三昧
宛轉機圓縱橫用大大用現前不存軌則推倒藩籬東西
南北南北東西歸去來兮混之不得類之不齊隨類而游
閑閑自由天上天下雲行水流四明天童山苾芻正覺述
普覺圓照大師曇讚戒行清苦築庵於義烏之僊山子爲
名曰大用久欲作銘而未果紹興九年子守四明與天童
老款偶縱談及此以銘屬之覺欣然不辭其筆力痛快殆
與信心銘相爲後先明年秋九月己未始授讚俾鐫之石
左朝散郎充徽猷閣待制提舉亳州明道宮潘良貴書
門人慧暉立石 鐫者陳璋男曦

右碑八分書額四字文十五行正書在鄞縣按正覺
姓李氏隰州人主泗州普照建炎間主天童寺僧不
滿二百覺納衆千二百人所著語錄行于世其文麗
則如洞下宗旨詔謚宏智禪師潘良貴字義榮又字
子賤金華人以上舍釋褐爲博士遷秘書郎欽宗時
以言事黜監信州高宗召爲左司諫改除工部以不
得其言求去主管明道宮越數年除考功郎知嚴州
未幾請祠起爲中書舍人以修撰提舉太平觀起知
明州除待制提舉明道宮有雜著十五卷朱子爲序
極推重之

宋佛窟巖塗田記碑

大宋台州臨海縣佛窟山昌國禪院新開塗田記

右宣教郎主管台州崇道觀謝伋撰 保信軍承宣使

知閣門事兼客省四方館事權樞密副都承旨曹勛

書 右朝請大夫新差權發遣撫州軍州兼管內勸農

營田事借紫金魚袋趙子游篆

台之爲郡負山並海阪田陝薄下上塗泥側耕危穫較計
毫釐以是富者無連阡陌中人皆爭尋常惟海濱廣斥之
地聚人力焉以防止水趨時如猛獸鷙鳥之發收穫如寇
盜之至或可以得大利農之知此者多矣過之者挾其槍
刈耨鉏咸有擊莫疾耰之心幸而得請於官又主伯亞旅
強弱之力有限比閭旅黨鄉州之心不同則人棄我取多

歸於佛之徒矣自佛法之人中國逃賦役而去業着幽禪以爲高此唐韓愈氏之所病也然佛之法大抵以舍身利物而無所在着爲心則韓子之譏學佛者之過也台之南二十里有山曰佛窟其院曰昌國周廣順間吳越國檢校刑部尙書包彥暉之所建

真宗朝改賜今名當南走瑞巖北入都城大道上傳車轂擊僧繭肩摩寢於斯食於斯殆無虛時而歲乏蓋藏院之檀越左朝奉郎通判湖州左君譽嘗爲之謀曰院北廿里有堰曰高湖岸之塗泥可田也左君旣亡而事不就紹興庚申季春僧宗辯來主是刹首發左君之遺意以語其徒願供租賦以奉公上出力役以給往來院衆復因等皆是

其說則狀其事於縣丞程君時攝邑事以爲無傷於民而利於公遂從其請東西盡衆田南伍師山北及下渡斷長補短爲田

於是富者出財少壯者出力能者出技或

棄耒而爲廬或捨地而增址暑不避暴炙寒不避溷薄四時之間無日休息沾體塗足以旦暮從事於斯固壅塞以防決蓄灌溉而能旱二年而成迺有積倉取供十方齋厨以給飛錫而來者皆大歡喜則具石將列檀施之名於左方且求文以記有僧崇教大師宗敏語宗辯曰左君之善謀而師克成之得所與左善者而記之則檀施悅矣今謝祠曹故善左別駕若求文於謝其無辭乎辯來請記如敏說余曰左君吾先人之所知也善與人謀嘗一言而爲茲

山永久之利樂辯能成其意故爲之書以示不知者時紹興十二年三月上澣日記

住持傳法默菴苾芻宗辯立石 郡士王賞摹刊

碑陰

今具列捨 名銜

胡承璋并妻阮三娘一百千牛一頭童居允并妻丁十二娘一百千牛一頭柯宗海并妻董十八娘孫可壽捨莊基一片姜廿八娘捨山一片高容王安上各捨田一畝比丘用一十千住瑞岳訥堂如勝比丘德從道滋尼景一淨覺彥 眞了柯壽胥柯壽朋鄭惡昌柯壽祺杞綽各一十千劉理將端卿陳懷喜張彥端李元各六千盧充堯盧積

周子珩林頗 公信鄭十娘各 千林與齡林鸞何允從
徐友直呂文柯有璋 文立盧元冲林文芝丘元政丘大
臻高章周思 慶之厲德慶徐元富李敦仁胡獻麟蔣

劉 俞德嚴蔣宗信何德通尼彥永

比丘敬 比丘如一宗式景仁惠印元靜 澄宗觀智明

梵清元曉用珩法 淨辯妙靜王五娘呂八娘視十二

娘盧三娘 娘高四七娘各三千左調左勁左勒葛子

文俞允升蔣思恭丘子永朱允琮周宗強盧仲壽盧瓊盧

良詹珉楊宗靖林元重徐敦 林宗茂林宗懿王旻丘璋

比丘體心元翼文素宗譯尼法會彥欽元用元曉沈七娘

吳九娘楊廿七娘 十娘 王廿五娘汪廿二娘牟

十九娘陳四娘陳九娘

各二千楊宗貴王

珙金十四娘徐允崇金堯李奭各二千五百盧元白盧元

呆周宗旦丘子堯 進益祝宗 孟珩盧允元解智丁彥

明蔣宗暉周文立梁才 張彥彬張偁宋脊曹惟實

章 之章反 陳宗有比丘宗敏惠超擇基梵威景安

了方文約文萃智誠陳九娘鄭十 娘張廿二娘楊廿

娘丁十六娘丁十四娘祝二十娘卓七娘李承富各一

李文富林忠厲公賢公竦公舉 各三千楊端復端臣

端一

當山助緣僧靈悟道權文

觀梵圓梵宗行淳文表梵

規文一文紹義榮了威慧嚴道奇可詠如外國雷宗一如

月幹當僧復因知殿宗逸知藏了存知庫彥清維那如鑑
副院梵規監院德敦 住持傳法苾芻寶因

右碑篆額五字文正書二十四行陰正書三十八行
在臨海南鄉昌國寺碑爲謝伋撰曹勛書按伋字景
思上蔡人叅政克家之子官至太常少卿紹興初侍
父寓居黃巖自號藥寮居士有藥寮吟稿勛字功顯
陽翟人組之子宣和五年賜同進士出身紹興中僑
寓天台以章太后北還迎鑾功官至昭信軍節度使
孝宗朝加大尉開府儀同三司卒贈少保諡忠靖有
松隱文集

宋吳械等天竺題名

吳械張口彥口口口龍庭實周執口吳口信周之翰凌哲
吳口潘良能陳口口袁相石延慶錢口口口陳之淵范
雲程敦口問口許口微口口紹興壬戌同校藝春關

右在下天竺摩崖正書八行字徑二寸按吳械宣和
元年海寧縣令見杭州府志潘良能金華人紹興五
年汪應辰榜進士秘書正字

宋秦檜家廟銅豆

惟紹興丙寅三月己丑帝命作豆賜師

臣檜宗廟以薦苴鹽惟子永世用享

石宋秦檜家廟銅豆

元

得之武林器高三寸口徑五

寸九分深一寸七分口旁有篆文銘二十九字案丙

寅爲高宗紹興十六年宋史云二月癸丑建秦檜家廟三月辛卯造秦檜家廟祭器檜本傳作正月立家廟紀言辛卯造祭器此器云己丑蓋器紀命下之日史紀始作之日也考檜子王燬好古鐘鼎文善作繆篆時爲翰林學士兼侍讀檜將以鑄器能銘顯子才學此篆卽命燬作無疑其實字體詭俗不合六書荒陋已極古彝器有稱太師少師無稱師臣者稱師則不臣矣然猶可曰不學無術至曰子永世用享則悖甚古人于君錫祭器必曰某拜稽首對揚天子丕顯休命某其子子孫孫永寶用享人臣體制宜然此乃不稱臣稱名而稱子可見其無復人臣之禮元錄此

器竊附古人鼎列神姦風存鄭衛之義非敢以穢惡之物躋諸蠶彘間也

宋三茅寧壽觀尙書省牒碑

紹興二十年尙書省奉勅賜額臨安府七寶山三茅堂

正書小字

尙書省牒

牒奉勅宣賜寧壽觀爲額牒至准勅故牒

行書

大字六行

紹興二十年六月日牒

正書小楷

尙書省印

簽書樞密院事兼口叅知政事巫押 叅知政事余押

太師尙書左僕射同中書門下平章事押

行書大字

明

嘉靖十八年右布政劉儲秀重編

正書徑一寸

右紫陽山七寶峰摩崖十二行按西湖遊覽志唐時爲三茅堂宋紹興二十年因東都舊名賜額殿曰太元內奉徽宗御畫茅君像累朝賜觀御書有高宗黃庭度人經寧宗道紀堂字理宗養生論咸淳臨安志紹興間賜古器三種又陸游三茅寧壽觀記紹興二十年十月詔賜行在三茅堂名寧壽觀因東都三茅寧壽之舊也初章聖皇帝建會靈觀實於崇元殿之側營三茅君殿是爲祖宗崇奉之始至是高宗尤垂意焉乃命道士蔡君大象知觀事蒙君守亮副之許其徒世守又命內侍劉敖興領置吏胥給清衛兵畧用大中祥符故事此賜敕後之大畧也惟誤六月爲

十月或未見此敕爾

宋高宗聖賢像贊石刻

朕自睦鄰息兵首開學校教養多士以遂忠良繼幸太學
延見諸生濟濟在庭意甚嘉之因作

文宣王贊機政餘閒厯取顏回而下七十二人亦爲製贊
用廣列聖崇儒右文之聲復知師弟子間纓弁森森覃精
繹思之訓其於治道心度幾焉

孔丘字仲尼魯人開元廿七年制追諡爲文宣王

大哉宣聖斯文在茲帝王之式古今之師志則春秋道由
忠恕賢於堯舜日月其舉維時載雍載此武功肅昭盛儀
海寓肆崇

顏回字子淵魯人贈充公

德行首科顯冠學徒不遷不貳樂道以居食埃甚忠在陋自如宜稱賢哉豈止不思

閔損字子騫魯人贈費侯

天經地義孝哉閔騫父母昆弟莫開其言汗君不仕志氣軒軒復我汶上出處休焉

冉雍字仲弓魯人贈薛侯

懿德賢行有一則尊子也履之成性存存駢角有用犁牛莫論刑政之言惠施元元

冉耕字伯牛魯人贈鄆侯

德以充性行以澡身二事在躬日躋而新並駢賢科得賢

與鄰不幸斯疾命也莫伸

冉求字子有魯人贈徐侯

循良之要在於有政可使爲宰千室百乘師門育材治心
扶性退則進之琢磨之柄

言偃字子游吳人贈吳侯

道義正己文學擅科爲宰武城聊以弦歌割雞之試牛刀
謂何前言戲爾博約則多

宰予字子我魯人贈齊侯

辨以飾詐言以致文苟弗執禮宜莫釋紛朽木糞牆置不
足云言語之科燁然有聞

仲由字子路卞人贈衛侯

升堂惟光千乘惟權陵暴知非委質可賢折獄言簡結纓
禮全惡言不耳仲尼賴焉

端木賜字子貢衛人贈黎侯

謙德知二器寶瑚璉動必機先孰並其辯一使存魯五國
有變終相其主譽處悠遠

卜商字子夏衛人贈魏侯

文學之目名重一時爲君子儒作魏侯師不可後禮始可
言詩假益小嫌聖亦不疵

林放字子邱魯人贈清河伯

禮之有本子能啟問大哉斯言光昭明訓德輝泰山誣祭
莫奮崇茲祀典盍永令聞

樊須字子遲齊人贈樊伯

養才以道聖人兼濟始謂不仁問鮑良喜寓志農圃似睽
仁義學稼之辭豈姑捨是

澹臺滅明字子羽武城人贈江伯

惟子有道天與異容狀雖云惡德則其豐南止江淹學者
雲從取士自茲貌或非公

曾參字子輿南武城人贈郈伯

夫孝要道用訓羣生以綱百行以通神明因子侍師答問
成經事親之實代爲儀刑

公冶長字子長齊人贈莒伯

子長宏度高出倫輩雖在縲紲知非其罪純德備行夫子

所采以子妻之尤知英槩

公西藏字子上魯人贈祝阿伯

倚爾子上魯邦之望以德則貴惟道是唱師聰師明友直友諒伯於祝阿儒風斯暢

原憲字子思魯人贈原伯

軾彼窮閭達士所賓邦無道穀進退孰倫敝衣非病無財乃貧賜雖不憚清節照人

有若字子有魯人贈卞伯

人稟秀德氣貌或同而子儼然溫溫其容兩端發問未答機鋒以禮節和其言可宗

鄭國字子徒魯人贈榮陽伯

伯夫榮陽實惟令德優人聖門過不留跡道以目傳妙則
心識猗歟偉歟後代之則

商澤字子季魯人贈睢陽伯

邈矣子季睢陽是伯屏息受業延教登席未踐四科固涉
六籍祀典載之好是正直

秦非字子之魯人贈汧陽伯

樂善哲士伯于汧陽傳道克正垂名允臧執德以洪用心
必剛表廣業履式贊素王

曾蒧字哲魯人贈宿伯

惟時義方有子誠孝怕怕聖域俱膺是道莫春舞雩詠歌
至教師故與之和悅宜召

巫馬施字子旗魯人贈鄆伯

天清日明密雨曷有師命持蓋子亦善扣惟夫子博三才
允究學者之樂所得遂茂

公哲哀字季次齊人贈郕伯

周衰偽隆政在羣公廉耻道微家臣聿崇不爲屈節撝默
自容子於是時凜然清風

漆雕徒父字子期魯人贈須句伯

遐想子期挾策聖帷涉道是嗜惟士可縻在德旣賢在名
乃垂洋洋之風逮今四馳

顓孫師字子張陳人贈陳伯

念昔顓孫商德與鄰學以子祿問以書紳參前倚衡忠信

是遵色取行違作戒後人

高柴字子羔衛人贈共伯

婉彼子羔受業先聖宗廟之間一出手正克篤於孝非愚
乃令師知其生有輝賢行

榮旂字子祺魯人贈雩婁伯

伯茲雩婁務學實著三千之徒七十是預匪善其行惟德
乃據紀于前書式彰厥譽

秦祖字子南秦人贈少梁伯

秦有子南 贊述作守道之淵成德之博範若鑄金契猶
發藥慙世明祀少梁寵爵

陳亢字子禽陳人贈顓伯

國朝金石志卷八
惟禽之間從容其鯉求以異問詩禮云爾謂一得三誠退而喜且知將聖不私其子

梁鱸字叔魚齊人贈梁伯

室家壯年無子則逐見於信史全齊之俗原本厥初師言可復以學則知接之宜篤

冉孺字子魯魯人贈紀伯

紀伯子魯聖學是務勵已斯的好問乃裕周旋中規容止可度尤矣昔賢後世所慕

顏之僕字叔魯人贈東武伯

賢行顏叔親承尼父志銳所期道尊是輔泥在鈞陶木就規矩終靡好爵揚名東武

石作蜀字子明秦人贈石邑伯

在昔石邑能知所尊懋依有德克述無言鼓篋槐市場名
里門此道久視彼美長存

顏高字子驕魯人贈琅邪伯

琅邪之伯其惟子驕數言旣彰德音孔昭已觀雲舞同聽
齊韶厯千百禩跂想高標

邦巽字子敘魯人贈平陸伯

彼美邦子先聖是承塙似已及堂陛將升良玉斯琢寒水
必氷錫壤平陸茂實器騰

任不齊字選楚人贈任城伯

任城建伯其表曰選淑問雅馳才華清遠競辰力行愛日

黽勉孔教崇崇令緒顯顯

顏無繇字路魯人贈杞伯

人誰無子爾嗣標奇行爲世範學爲人師請車誠非顧匪其私千載之下足以示慈

曹卹字子循蔡人贈曹伯

肅肅曹伯王室之裔積習樂道切瑳明義惟善則主爾德是賴史筆有煥令名永紀

縣成字子祺魯人贈鉅野伯

至聖立教子祺安雅擅譽魯邦啟祚鉅野煒矣風猷時哉用捨出倫離類後學是假

顏曾字子聲魯人贈朱虛伯

褒錫朱虛在器輪輿儒室振領聖門曳裾賢業得蘊美材
以攄百世不刊載觀成書

孔忠字子茂魯人贈汝陽伯

惟子挺生道德之門佩服至論鯉則弟昆三得三亡所問
殊溫君子歸宓義不掩恩

狄黑字哲衛人贈臨濟伯

仰止狄哲抱負淵通游泳德化揚素風偉識旣異持教
乃隆厥志茂焉茲祀無窮

漆雕哆字子斂魯人贈武城伯

子斂受封爰居武城疊疊其間翩翩其英樞衣時習願學
日明誕敷孔教爵里䟽榮

申枏字子續魯人贈魯伯

剛毅近仁志操莫渝性匪祝鮀面豈子都有一於此剛名可圖云慾則柔益生之徒

壤駟赤字子徒秦人贈北微伯

式是壤伯昭乎聖徒執經請益載道若無詩書規矩問學楷模得時而駕領袖諸儒

施之常字子恒魯人贈乘氏伯

開國乘氏有德斯彰叅稽百行贊理三綱自拔行間策名甚光在史藹藹厯久彌芳

公祖句茲字子之魯人贈期思伯

惟彼子之錫伯期思與賢並進得聖而師彬彬雅道翼翼

令儀上目至言廟食不隳

伯虔字子折魯人贈聊伯

有懷子折全魯之彥儒行旣名聊伯乃建兢兢受道奕奕
崑弁懿選嘉訪世享馨薦

南宮括字子容魯人贈邾伯

先覺旣位簪履並馳尙德君子爾乃兼之羿羿可慙禹
可師三復此道載觀白圭

公孫龍字子石楚人贈黃伯

黃伯著祀公孫是云彌縫中道協輔斯文藏修方異漸漬
其勤史詞不忘播爲清芬

廉絜字唐衛人贈呂父伯

兄弟之邦士有廉庸涵泳素教表揭儒宗杏壇探頤洙泗
從容作興一時莒父其封

叔仲會字子期魯人贈瑕邱伯

瑕邱祚邑子期是爲親訓有日廣業于時四教允隆五常
以持比肩俊傑聞望斯垂

商瞿字子木魯人贈蒙伯

易之爲書彌合天地五十乃學師則有是子能受授洗心
傳世知幾其神宜被厥祀

司馬耕字子牛宋人贈向伯

手足甚親志異出處離將爲亂子乃脫去在汚能潔危而
有慮內省若斯何憂何懼

蘧瑗字伯玉衛人贈衛伯

有衛伯玉夫子與居寡過未能薦贊使乎以屍諫君友則史魚果得進賢爛然簡書

公西赤字子華魯人贈郛伯

學者行道敝縕亦稱使齊光華偶爲肥輕周急之言君子所令答問允嚴理皆先經

公伯僚字子周魯人贈任伯

人有賢否道有廢興子如命何營營震驚季孫雖惑景伯莫平師資一言秩祀亦懲

漆雕開字子開魯人贈滕伯

仕進之道要在究習具臣而居咎欲誰執斯未能信謙以

有立闕里悅之多士莫及

必不齊字子賤魯人贈單伯

君子若人單父之政引肘寤君放魚稟令傳郭勿獲遂能
制命百代理邑用規觀聽

燕伋字思秦人贈漁陽伯

師席高振大成是集至道克傳賢達斯執善教云表儒風
可立漁陽之士得跂而及

申黨字周魯人贈邵陵伯

伉僉申周四科與儔逸駕文囿鼓枻儒流冠珮旣燕言動
允休邵陵得封可想清修

琴牢字子開衛人贈南陵伯

多能鄙事聖人曲意惟其知之是以不試宗魯雖友弔必
以義尚師嘉言祀亦罔替

秦商字子丕楚人贈上洛伯

孔父秦父相尚以力俱生賢嗣相與以德是父是子致詰
疇克會弁儒林令名無極

步叔乘字子車齊人贈淳于伯

勉勉子車封邑淳于親炙避席唯諾趨隅發微旣博雅道
是扶抑可尚也不亦美乎

顏辛字子柳魯人贈蕭伯

孰封于蕭實惟子柳夙低格言克遵善誘明德斯馨賢業
所就以侑于儒傳芳逾茂

奚容蒧字子哲魯人贈下邳伯

雍容子哲已望堂室幼則有造成則祖述文彩日化儒効力弼永觀厥成德音秩秩

冉季字子產魯人贈東平伯

東平子產姓著盛時奉師

講道之微答問其敏婉妙

以思升降陸廉尙想 姿

后處字子里齊人贈營邱伯

溫溫子里入閭至聖擇道之華秉德之柄深造闡域不乖言行全齊之封竹素爲盛

左人郢字行魯人贈臨淄伯

伯彼臨淄左行稱賢踰蹤十哲秀穎三千心悅誠服家至

戶傳樂只君子文聲益宣

秦冉子開蔡人贈彭衙伯

彭衙高士經籍是親贊成德藝協於彝倫底績聖道期肖
素臣優哉游哉學以致身

樂欬字子聲贈昌平伯

樂氏子聲錫爵昌平信道之篤見善乃明引領高節載惟
思誠先賢聿集出爲時英

御書

之寶

右宣聖及七十二弟子贊宋高宗製并書其像則李龍眠
磨所畫也高宗南渡建行宮于杭紹興十四年正月始卽

岳飛第作太學三月臨幸首製先聖贊後自顏淵而下亦
譔辭以致褒崇之意二十六年十二月刻石於學附以太
師尚書左僕射同中書門下平章事兼樞密使秦檜記檜
之言有曰孔聖以儒道設教弟子皆無邪雜背違於儒道
者今檜紳之習或未純乎儒術顧馳狙詐權譎之說以僥
倖於功利其意益爲當時言恢復者發也嗚呼靖康之禍
二帝蒙塵汴都淪覆當時臣子正宜枕干嘗膽以圖恢復
而檜力主和議攘斥衆謀盡指一時忠義之言爲狙詐權
譎之論先儒朱熹謂其倡邪說以誤國桀虜勢以要君其
罪上通于天萬死不足以贖者是也昔龜山楊先生時嘗
建議罷王安石孔廟配享識者韙之訥一介書生幸際聖

明備員風紀茲於仁和縣學得觀石刻見檜之記尙與圖贊並存因命磨去其文庶使邪詖之說姦穢之名不得廁于聖賢圖像之後然念流傳已久謹因備識俾後覽者得有所考云

宣德二年歲在丁未秋七月朔巡按浙江監察御史海虞吳訥識 教諭林賢訓導劉數摹勒于石

右在杭州府學正書碑之始末具見碑後明御史吳訥跋中其遷移始末見明楊一清遷石經記大約與石經道統贊同也當時自仁和學徙置尊經閣之下贊以傾壁爲數則一十有五萬厯府志謂當時仍賜刻本于諸學校焉龍眠畫象 本朝陳章侯少時摹

兩浙金石志卷八
寫頗有臧否聞南宋間成都石室文公翁高朕諸刻猶
有存者惜無歐趙諸人一致之也

兩浙金石志卷八

香山縣知縣候補通判仁和周兆蕙刊

臨海洪瞻塘校